

Berus dirampas dikembalikan

➔ Peniaga perlu patuhi peraturan ditetapkan ikut Akta Perihal Dagangan 2011

**Laporan Rohaniza Idris,
Mohd Nasaruddin Parzi
dan Faris Fuad**
bhnews@bh.com.my

■ Kuala Lumpur

Kementerian Perdagangan Dalam Negeri, Koperasi dan Kepenggunaan akan memulangkan berus cat disyaki diperbuat daripada bulu babi yang dirampas jika peniaga mematuhi peraturan ditetapkan mengikut Akta Perihal Dagangan 2011.

Menterinya, Datuk Seri Hamzah Zainuddin, berkata kementerian

sudah memberikan tempoh sebulan berakhir 9 Mac lalu kepada peniaga untuk mengasing, melaibel, menanda dan mempamerkan label untuk berus cat yang menggunakan bulu babi.

Katanya, gerakan penguatkuasaan dan pemeriksaan sudah dijalankan sebaik tempoh sebulan itu berakhir bagi mengesan sama ada peniaga mematuhi peraturan berkenaan.

“Jika peniaga mengikut peraturan ditetapkan, kementerian akan memulangkan barang yang dirampas. Jika masih berdegil, kita akan ambil tindakan,” katanya menjawab soalan tambahan Hee Loy Sian (PKR-Petaling Jaya Selatan) pada sidang Dewan Rakyat, semalam.

Peniaga degil akan didakwa
Hamzah berkata, bagi peniaga yang tidak mematuhi peraturan, berus yang dirampas akan dijadikan bahan bukti untuk tindakan pendakwaan.

BH sebelum ini mendedahkan lambakan berus cat bulu babi yang dijual di premis perkakasan binaan, bukan sahaja digunakan untuk mengecat, malah dalam penyediaan makanan.

Ia didekahkan selepas ujian makmal oleh Institut Penyelidikan Produk Halal (IPPH) Universiti Putra Malaysia (UPM) ke atas sampel berus cat kod A913 dan A680 yang diperoleh **BH**, mengesahkan ia diperbuat daripada bulu babi.



Bagi peniaga yang tidak mematuhi peraturan, berus yang dirampas akan dijadikan bahan bukti untuk tindakan pendakwaan”

Hamzah Zainuddin,
Menteri Perdagangan
Dalam Negeri, Koperasi
dan Kepenggunaan

